

Protocol no. 21**Sezzüda da marcurdi, 6 gün 2012, 19.30 – 23.45**

Preschaints: Albert Mayer, Andri Poo, Men Caviezel, Dumeng Jann,
Marianne Werro-Lehmann e Claudia Luppi (protocol)
Mario Riatsch per las tractandas 149 e 150

Protocol

Il protocol no. 20 da la sezzüda da marcurdi, 30 mai 2012 vain approvà.

147 021**FABRICA****G. Lutz e C. Di Guimaraes de Aquino – Chasa Stron 261 e 261A**

Il schef da fabrica prelegia il decret per la prolungaziun dal permiss da fabrica cha'l giurist dal cumün ha formulà. Displaschaivelmaing nun esa fin uossa stat pussibel da procurar la conferma in scrit da la decisiun da la chüra da monumaints dal 2009 ch'id es impegnativa tenor il decret. Tant l'architecta sco eir l'istanza da fabrica dal cumün as sfadian da survgnir la conferma necessaria i'ls prosems dis. Implü ha il patrun da fabrica retrat la dumonda da fabrica fatta separadamaing dal 2011 per pudair dozzar ed isolar il tet. El giavüscha, sco cusglià da la cumischiun da fabrica, da pudair integrar tala dumonda sco müdamaint da proget illa dumonda da fabrica chi vess da survgnir la prolungaziun dal permiss. Subit cha'l documaint da la chüra da monumaints es avantman, gnarà il müdamaint dal proget trattà in Cussagl per pudair in seguit, premiss cha'l müdamaint da proget gniss fat bun, trametter il decret al patrun da fabrica.

148 830**TURISSEM****Museum pauril – Sustegn finanziel**

Sar Rüedlinger chi ha drizzà aint sün basa privata ün museum pauril a Curtinaglias fa la dumonda per ün sustegn finanziel davart il cumün. Il Cussagl cumünal predscha in fuond ingaschamaints a bönn da nossa regiun turistica, uschè eir quella da sar Rüedlinger. Üna contribuziun annuala nu po in quist cas gnir pajada causa cha talas vegnan concessas be a societats in cumün e na a privats. Eir ün sustegn finanziel d'üna jada nun es uschè simpel a conceder causa cha tals vegnan normalmaing concess per progets specifics a man d'ün büdschet da l'occurenza o dal proget. Il büdschet agiunt a la dumonda da sar Rüedlinger nu muossa sü cuosts unics per ün proget o ün occurenza dimpersè ils cuosts curreints da minch'on dal museum privat. Il Cussagl es da l'avis cha sportas turisticas sün basa privata sajan bainschi ün inrichimaint per nossa regiun turistica, ma cha la rendita da talas saja da princip chosa dal privat.

149 830**TURISSEM****Punts penduossas Val Sinestra – Zuort**

Sco protocolà fingià suot la tractanda no. 132 dal protocol dals 22 mai 2012 ha nos silvicultur Mario Riatsch survgni l'incumbenza da metter ad ir darcheu insembel culla gruppa da god e cun sustegn d'ün perit las punts penduossas donnagiadas tras las naiveras l'inviern passà da maniera cha la sgürezza correspuonda a las pretaisas per l'adöver i'ls mais da stà. Il transit sur las punts vain dat liber davart il cumün subit cha las punts sun controlladas dal perit. Quista controlla ha lö ils 15 gün 2012.

150 830

TURISSEM

Parkin da la "Fundaziun Not dal Mot" – Dons causa naiveras e vent

Eir il parkin ha subi dons causa las naiveras da l'inveirn passà e causa il vent, uschè cha'l respunsabel da la fundaziun Not dal Mot vaiva l'intenziun da na rivir il parkin quista stà pel public. Causa cha'l parkin es üna sporta turistica unica e da grond'importanza per nossa regiun ha gnü lö sün intimaziun da la TESSVM üna visita occulara cun Not Vital sco eir culla schefa da turissem, cul capo, cun nos silvicultur e cun nos manader tecnic per analizar che sforzs chi füss da far per cha'l parkin pudess scha ma pussibel gnir rivi eir quista stà. Nos silvicultur ha tut sü ils dons e preschainta al Cussagl cumünal üna calculaziun da cuosts per refar ils dons. Tenor sias spiegaziuns es avantman eir blera bos-cha crodada sün terrain cumünal da la vart schneistra da la val, per part forsa eir causa cha la naiv chi vain rumida in cumün vain büttada là giò per la val. Quella part dal parkin sto natüralmaing gnir rumida dal cumün. Pels ulteriurs dons illa part da la fundaziun decida il Cussagl cumünal da conceder il sustegn davart il cumün sco pratichà i'ls ultims ons in fuorma da lavur e maschinas.

151 942.423.05

Fits per terrains cumünals

Otto e Monica Scandella – Deposit da material da s-chav sün terrain cumünal

In connex culla fabrica d'üna chasa nouva in Saranschasch han Otto e Monica Scandella inoltrà la dumonda da pudair dovrar la parcella cumünala visavi a quella parcella chi vain surfabrichada sco deposit ad interim fin d'utuon 2012 pel material chi vain lura darcheu dovrà per far la rimplaina. I's tratta da raduond 100 fin 150 m³ material. In vista cha la parcella cumünala pel deposit es be daspera e chi nu füss radschunaivel da far transportar il material per la rimplaina our il Prà Dadoura per til transportar in pacas eivnas darcheu inavo, decida il Cussagl cumünal da conceder in quist cas il permiss per tour a fit il terrain a cuorta dürada, ma da metter las seguaintas cundiziuns:

- Pel material chi vain deponà vain inchaschè 30.--/m³.
- Subit cha'l deposit es darcheu rumi e mis i'l stadi uriunt restituishescha il cumün fr. 25.--/m³, uschè cha'l fit pel plazzal importa fr. 5.--/ m³.
- Per prevgnir a dons sto gnir installada üna palisada ed il material sto gnir cuvernà giò per ch'el nu vegna lavà giò per la costa culla plövgia.
- La parcella cumünala sto esser rumida e missa i'l stadi uriunt fin il plü tard ils 1. november 2012
- Dons invers terzas personas van a charg dal patrun da fabrica.
- Il cumün inchascha üna taxa da trattamaint da fr. 50.--.

152 790

PLANISAZIUN DAL TERRITORI

Sendas BAW

Cun repassar la revisiun totala da la planisaziun cumünala s'ha constattà cha las sendas indichadas süls plans nu correspuondan in singuls cas a las sendas indichadas i'l plan regional e süls plans chantunals da la cumünanza grischuna per sendas (BAW). Il schef da planisaziun comunichescha cha'ls plans cumünals gnaran adattats. Implü rapportescha'l a regard l'intent d'inoltrar pel plan regional eventualas propostas per ulteriuras sendas.

153 217.311

Cumprita da mobiglia – Chasa da scoula

Mobiliar nouv da scoula – Plü bassas sortidas sco büdschetà

Il schef da scoula comunichescha il fat allegraivel cha culla cumprita dal mobiliar nouv s'haja pudü restar cun fr. 20'343.-- per bainquantant suot ils fr. 40'000.-- büdschetats, quai causa chi's ha tschernü pro las maisas ün sistem plü simpel co previs uriuntamaing.

154 140.506.02 Veicul pumpiers
S-chala nouva – Credit posteriur da fr. 12'000.—

Sco protocolà i'l protocol dals 3 october 2011 ha il corp da pumpiers Pisoc stuvü rimplazzar il veicul da pumpiers cun s-chala ADL. Tenor la clav da scumpart süls cumüns dal consorzi Pisoc d'eira gnü calculà ed indichà pel cumün da Sent ün import da raduond frs. 40'000.--. Quist import es eir gnü tut aint il preventiv dal 2012. Displaschaivelmaing resultan uossa pel cumün da Sent üna partecipaziun da fr. 52'000.-- vi dal veicul. Il Cussagl cumünal decida perquai da conceder ün credit posteriur da fr. 12'000.-- pel surpassamaint da l'import previs il preventiv.

155 6 TRAFIC
“Via Champestra” – Dumonda per dozzamaint da la tonnascha

Il schef da vias champestras spiega cha per evitar massa bler trafic da camiuns as vaiva da seis temp limità la tonnascha per la “Via Champestra” sün 9 t. Intant es la via gnüda fabbrichad'oura tras l'ameglioraziun sco via d'access per l'agricultura, ma causa cha'ls veiculs acriculs nu surpassaivan quella jada la limita da la tonnascha existenta nu d'eira avantman la necessità da dozzar la tonnascha per la via. Hozindi s'ha la situaziun ill'agricultura müdada, uschè cha la necessità pel dozzamaint da la tonnascha es avantman causa cha l'adöver actual da la via nu correspuonda a la ledscha da trafic. Davò üna visita oculara eir culla pulizia chantunala s'esa gnü da la conclusiun d'inoltrar la dumonda pel dozzamaint da la tonnascha sün 18 t. Implü vain fatta la dumonda per la limita da la larghezza sün 2.30 m causa cha la via champestra aintra illa via da Crusch chi ha quella limita da la larghezza. La dumonda es inoltrada a l'uffizi per la sgürezza da trafic da la pulizia chantunala dal Grischun.

156 300.365 Contribuziuns e donaziuns
“Veterans Motta Naluns” - Sustegn finzial

Ils „Veterans Motta Naluns“ han als 21 gün 2012 ün inscunter culs veterans dad Ischgl sün Motta Naluns. Els fan la dumonda per üna contribuziun vi dals cuosts da l'aperitiv. Il Cussagl cumünal decida d'as participar vi da tals cuosts cun ün import da fr. 200.--.

157 ORIENTAZIUNS

Cumischiun da finanzas PEB

Il capo orientescha cha la cumischiun da finanzas regiunala haja elavurà insembel culla PEB ün model da finanziaziun per pudair finziar ils progets regiunals inoltrats eventualmaing cun raps our dals fits d'aua dals CCC OEE.

Intereg

Il capo orientescha ch'el haja tut part a la sezzüda dal cussagl da l'Intereg (Inreg-Rat) ingiò ch'el haja pudür s-chaffir contacts cun divers exponents da la politica sur cunfin.

Deponia nouva Sur En

Il capo orientescha cha cun installar la deponia d'immundizchas nouva e levar la deponia veglia a Sur En saja i a perder il deposit per palperi e chartun. La scheffa d'immundizchas pigliarà sü contact cul manader tecnic per verer co cha'l problem pudess gnir scholt.

L'actura: